



NOGOMETNI SAVEZ FEDERACIJE BOSNE I HERCEGOVINE

PROPozICIJE
takmičenja Prve futsal lige FBiH
za takmičarsku 2021/2022 godinu

Sarajevo: septembar/rujan 2021. godine

Broj: 1971/21
Sarajevo: 23.09.2021.

Izvršni odbor Nogometnog saveza Federacije BiH na osnovu člana 32. Statuta NS Federacije BiH, na 8. sjednici održanoj 23.09.2021. godine u Sarajevu, a na prijedlog Komisije za takmičenje NS FBiH, donio je s l j e d e ć e:

PROPOZICIJE
takmičenja Prve futsal lige FBiH
za takmičarsku sezonu 2021/2022

I - OPŠTE ODREDBE

Član 1.

- 1.01. Ovim Propozicijama utvrđuje se način organiziranja i provođenja takmičenja u Prvoj futsal ligi Federacije BiH u takmičarskoj 2021/2022 godini.

II - UČESNICI TAKMIČENJA

Član 2.

- 2.01. Učesnike takmičenja Prve futsal lige Federacije BiH za takmičarsku sezonu 2021/2022 utvrđuje Izvršni odbor NS FBiH na osnovu plasmana iz prethodne takmičarske sezone i na osnovu prijava klubova i k/ž saveza.
- 2.02. U takmičenju Prve futsal lige Federacije BiH učestvuju klubovi sa područja Federacije BiH na osnovu dostavljenih prijava.
- 2.03. Klubovi Prve futsal lige Federacije BiH će biti raspoređeni u četiri grupe na osnovu regionalne podijeljenosti.
- 2.04. Učesnike u takmičenju i grupe utvrđuje Izvršni odbor NS Federacije BiH.
- 2.05. U prvoj futsal ligi FBiH grupa 1, 2, 3 i 4 igraju sljedeći klubovi:

Grupa 1

1. FKA CENTAR Sarajevo
2. MNK DIABIH Sarajevo
3. MNK DRINA Goražde
3. . MNK NEIMARI Zenica
4. MNK NOVI TRAVNIK
- 5 FK ŽELJEZNIČAR Sarajevo
6. MNK ŽEPČE
7. KMF VITEZ

Grupa 2

1. MNK BANOVIĆI
2. FC LILIUM Dobojski Istok
3. MNK LUKAVAC
4. MNK KLANAC Brčko
5. KMF LUX Brčko
6. MNK ODŽAK
7. FT TEŠANJ

Grupa 3

1. MNK ČAPLJINA
2. MNK ČULIN MLIN Livno
3. MNK ISKRA VRBAS Bugojno
4. FK KONJIC
5. MNK MOSTARSKE KIŠE Mostar
6. HMNK RUDNIK Mostar
7. MNK SELJAK Livno
8. HFC ZRINJSKI Mostar

Grupa 4

1. MNK BIHAĆ 1260
2. MNK BUBA MARA Cazin
3. FK KONJODOR Bužim
4. MNK MUJO HRNJICA Velika Kladuša
5. MNK SPARTA Sanski Most

III - RUKOVOĐENJE TAKMIČENJEM

Član 3.

- 3.01. Takmičenjem rukovodi Izvršni odbor NS FBiH putem Komisije za takmičenje NS FBiH. Izvršni odbor NS FBiH donosi kalendar takmičenja i utvrđuje način žrijebanja klubova.
- 3.02. Organi takmičenja Prve futsal lige FBiH su:
 - Komisija za takmičenje/natjecanje NS FBiH - rukovodi takmičenjem, registruje utakmice, donosi prvostepene odluke, rješava žalbe u prvom stepenu, rješava sva pitanja iz takmičarskog dijela, određuje delegate za utakmice, vrši analizu obavljanja delegatske dužnosti;
 - Komisija za suce i suđenje NS FBiH - delegira sudije i vrši analizu suđenja na svim utakmicama;
 - Disciplinska komisija NS FBiH – donosi prvostepene disciplinske odluke;
 - Apelaciona komisija - je drugostepeni organ koji donosi odluke po žalbama na prvostepene odluke iz takmičarskog i disciplinskog dijela,
 - Druge komisije Izvršnog odbora NS FBiH
- 3.03. Ostale nadležnosti i zadaci komisija i pravnih tijela NS Federacije BiH propisani su Pravilnikom o radu Komisija Izvršnog odbora, pravnih tijela i takmičarskih organa NS FBiH te ostalim pravilnicima i odlukama Izvršnog odbora NS FBiH i NS/FS BiH.

Član 4.

- 4.01. Takmičenje Prve futsal lige Federacije BiH u grupama 1, 2 i 3 provodi se po dvostrukom bod sistemu i vremenski utvrđenom kalendaru, sa dvije takmičarske polusezone, jesen i proljeće, dok se takmičenje u Prvoj futsal ligi FBiH grupa 4 provodi po trostrukom bod sistemu sa dvije takmičarske polusezone.
- 4.02. U prvom dijelu takmičenje Prve futsal lige FBiH grupa 4 se odvija dvokružno, a igrat će se 10 kola (5+5) – domaćin gost, a raspored utakmica se određuje žrijebom takmičarskih brojeva.

U drugom dijelu takmičenja Prve futsal lige FBiH grupa 4 se odvija jednokružno, a igra se 5 kola. Klubovi dobivaju takmičarske brojeve na osnovu plasmana nakon prvog dijela (10 kola) i to na sljedeći način:

- klubovi plasirani od 1. do 3. mjesta dobivaju identičan takmičarski broj; prvoplasirani broj 1, drugoplasirani broj 2 i trećeplasirani broj 3.

- klubovi plasirani na 4. i 5. mjesto dobivaju takmičarski broj na sljedeći način; četvrtoplasirani klub broj 5, a petoplasirani klub broj 4.

- u slučaju da klubovi nakon prvog dijela sezone imaju isti broj bodova plasman na tabeli se određuje na osnovu Pravilnika o nogometnim takmičenjima NS/FS BiH.

4.03. Kalendar i raspored takmičenja, usvaja Izvršni odbor NS Federacije BiH.

4.04. Raspored odigravanja prvenstvenih utakmica prvog dijela određuje se prije početka takmičarske godine žrijebom uz mogućnost primjene poludirigovanog načina žrijebanja samo za klubove iz istog mjesta gdje igraju svoje prvenstvene utakmice kao domaćini, s tim da ako su zainteresovani mogu podnijeti pismeni zahtjev Komisiji za takmičenje NS FBiH da im se omogući razdvajanje odigravanja prvenstvenih utakmica kao domaćina u odnosu na klub iz istog mjesta, i to najkasnije pet dana od određenog datuma provođenja žrijeba za raspored takmičenja za takmičarsku godinu.

4.05. Odluku o izmjenama kalendara takmičenja, u slučaju proglašenja vanrednog stanja ili stanja nesreće od strane nadležnih organa BiH ili Federacije BiH, donosi Komisija za takmičenje NS Federacije BiH.

4.06. Raspored utakmica za prvenstvo Prve futsal lige FBiH određuje se žrijebom takmičarskih brojeva i primjenom „Bergerove tablice“.

Član 5.

5.01. Takmičenje Prve futsal lige FBiH administrativno se vodi kroz COMET informacioni sistem.

5.02. U dvoranama klubova Prve futsal lige FBiH treba biti posebna prostorija za sastavljanje zapisnika. Klub domaćin obavezan je da obezbijedi ispravan kompjuter sa štampačem i ispravnom internet konekcijom za potrebe COMET informacionog sistema.

IV – DUŽNOST KLUBOVA

Član 6.

6.01. Klubovi su obavezni da dostave u Sekretarijat za takmičenje;

-naziv dvorane na kome će igrati utakmice;

-mjesto odigravanja utakmica;

-boju dresova (dres, šorts i štucne), kao i rezervnu boju sa kojom će klub nastupati;

-dan odigravanja utakmica (subota ili nedjelja).

Član 7.

7.01. Klub domaćin igra utakmice u mjestu sjedišta kluba, a u nedostatku dvorane u zamjenskoj dvorani koja je dobila suglasnost nadležnog organa, a koja ne može biti van kantona/županije u kome je sjedište kluba, izuzev ako se radi o dvorani koja se nalazi na području drugog kantona/županije, a nije udaljena više od 50 km od mjesta sjedišta kluba.

- 7.02. Dvorana koju klub prijavi pred početak takmičarske sezone se može se mijenjati tokom sezone, izuzev u iznimnim situacijama o kojima odlučuje Komisija za takmičenje NS FBiH uz poštivanje principa regularnosti takmičenja.

Član 8.

- 8.01. Organizaciju utakmica vrše klubovi domaćini, koji su obavezni obezbijediti sve uslove u skladu sa važećim propisima. Klub domaćin je obavezan poduzeti sve potrebne mjere za sigurnost sudaca, delegata i gostujućeg tima, za vrijeme odigravanja utakmice i sve do napuštanja dvorane.
- 8.02. Klub domaćin isključivo je nadležan za red i sigurnost prije, tijekom i nakon utakmice, te će biti pozvan na odgovornost zbog bilo kojeg incidenta, pa može biti kažnjen u skladu sa odredbama Disciplinskog pravilnika NS/FS BiH. U slučaju nastanka štete, klub domaćin dužan je nadoknaditi štetu nastalu incidentom.
- 8.03. Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.
- 8.04. Klub domaćin obavezan je na jarbole postaviti Državnu zastavu BiH i zastavu NS/FS BiH. Na jarbolima mogu biti entitetske zastave, zastave kantona/županija, klupske zastave i zastave fair-playa. Postavljanje drugih zastava nije dozvoljeno. Istaknute zastave moraju biti istih dimenzija.

Član 9.

- 9.01. Klubovi su na svim utakmicama dužni prijaviti minimalno jednog trenera sa odgovarajućom UEFA licencom izdatom od strane Centra za edukaciju kadrova NS/FS BiH, a koji je registriran u COMET informacioni sistem.
- 9.02. Klubovi su dužni na svim prvenstvenim i kup utakmicama osigurati sljedeće:
- Licenciranog trenera sa odgovarajućom UEFA licencom za futsal
 - Akreditiranog službenog predstavnika (akreditacije izdaje NS FBiH)
 - Akreditiranog komesara za bezbjednost na domaćim utakmicama (akreditacije izdaje NS FBiH)
 - Akreditiranog liječnika ili fizioterapeuta na domaćim utakmicama (akreditacije izdaje NS FBiH)
 - Na domaćim utakmicama vozilo hitne pomoći ili adekvatno zamjensko vozilo sa dežurnim vozačem u slučaju potrebe prijevoza do zdravstvene ustanove.
- 9.03. Predstavnik kluba, glavni trener ili pomoćni trener ne mogu biti ista osoba.
- 9.04. Predstavnik kluba i igrač ne mogu biti ista osoba.
- 9.05. Predstavnik kluba, komesar za bezbjednost, ljekar i fizioterapeut obavezni su posjedovati odgovarajuću takmičarsku akreditaciju koju izdaje NS FBiH za takmičarsku sezonu 2021/2022.
- 9.06. Registracija trenera vrši se za takmičarsku sezonu.
- 9.07. Glavni treneri i treneri obavezni su posjedovati validnu UEFA licencu te ispuniti sve uslove za registraciju trenera u COMET informacioni sistem.
- 9.08. Validnost izdatih potrebnih dokumenata mogu kontrolisati samo subjekti koji su ih i izdali, a delegat na utakmici utvrđuje njihovo posjedovanje, odnosno identitet lica.
- 9.09. Osobe sa spiska prijavljenih lica koje nemaju odgovarajuću akreditaciju, ne mogu se nalaziti u tehničkom prostoru, osim zamjenskih igrača.
- 9.10. Na klupi kluba Prve futsal lige FBiH mogu sjediti glavni trener i treneri samo sa validnom UEFA licencom a koji su registrirani putem COMET informacionog sistema.

- 9.11. UEFA trenerske licence moraju biti validne da bi isti bili registrirani u COMET informacijski sistem za takmičarsku sezonu 2021/2022 od strane Centra za edukaciju kadrova NS/FS BiH.
- 9.12. Takmičarske akreditacije službenog predstavnika, komesara bezbjednosti, ljekara i fizioterapeuta kluba Prve i Prve futsal lige FBiH validne su ako su izdane od strane NS FBiH za takmičarsku/natjecateljsku 2021/2022 godinu.
- 9.13. Sva akreditirana/licencirana službena lica moraju biti unesena i evidentirana u COMET informacijski sistem (treneri, predstavnici kluba, ljekari, fizioterapeuti i komesari za bezbjednost), od strane administracije NS FBiH odnosno Centra za edukaciju kada su u pitanju treneri.

Član 10.

- 10.01. Klub domaćin obavezan je utakmicu prijaviti nadležnoj policijskoj upravi i osigurati prisustvo pripadnika Policijske uprave i najmanje 2 pripadnika profesionalne zaštitarske agencije sve dok se utakmica igra, te dok gostujući klub i službena lica utakmice bezbjedno ne napuste grad. Klub domaćin obavezan je imati osobu koja se stara o sigurnosnom aspektu prije, za vrijeme i nakon utakmice, te organizovati redarsku službu.
- 10.02. Bez pismenog odobrenja nadležne policijske stanice, prisustva policije, dežurne ljekarske službe, sanitetskog vozila, redarske službe ili pripadnika profesionalne zaštitarske agencije utakmica se neće igrati. Odluku o neodigravanju utakmice donosi delegat utakmice i saopštava je sudiji utakmice i zvaničnim predstavnicima klubova, prije početka utakmice i sve to evidentira u izvještaju delegata utakmice i zapisniku sa utakmice.

Član 11.

- 11.01. Klub domaćin obavezan je obezbijediti mjerioca vremena i najmanje jednu osobu za čišćenje terena, koji se moraju javiti delegatu i sudijama utakmice najmanje 30 minuta prije početka utakmice i biti spremni i sposobni za obavljanje te dužnosti.
- 11.02. Svi klubovi organizatori utakmice Prve futsal lige FBiH obavezni su delegatu prije početka utakmice prijaviti obučenog mjerioca vremena te su odgovorni za njegovo ponašanje i rad na utakmici.
- 11.03. Svaka dvorana mora imati moderan semafor da gledaocima, igračima i službenim osobama omogući tačne informacije koje se odnose na:
- imena obje ekipe,
 - preostalog vremena u bilo kojem period igre, odbrojanje u minutama, sekundama i desetinkama sekunde od 20.00.0 do 0.00.0,
 - preostalo vrijeme kazne koje se izdržava, zbog isključenja igrača ili dva igrača iz obje ekipe, odbrojavanje 02.00-0.00.0,
 - rezultat ,
 - time-outa, odbrojavanje 01.00.0-0.00.0,
 - akumulirane prekršaje.
 - U slučaju neispravnosti semafora u dvorani klub domaćin je dužan obezbijediti stolni elektronski pokretni semafor ili stolni ručni semafor (npr odbojka, stolni tenis...itd), i ručnu štopericu.
- 11.04. Za odigravanje utakmica Prve futsal lige FBiH klub domaćin je obavezan obezbijediti tri (3) ispravne lopte za futsal u skladu sa pravilom 2. Pravila futsal igre.
- 11.05. Klub domaćin za neispunjavanje ovih obaveza snosi takmičarske i disciplinske posljedice u skladu sa Pravilnikom o nogometnim takmičenjima NS/FS BiH i Disciplinskim pravilnikom NS/FS BiH.

Član 12.

- 12.01. U dvorani moraju postojati svlačionice za obje ekipe i posebna svlačionica za suce. Sve svlačionice trebaju imati mokre čvorove - kupatila sa toplom vodom, za igrače sa tri (3) tuš ruže, a kod sudaca jedna (1) tuš ruža. Svaka svlačionica (sudijska posebno) treba imati zaseban WC.
- 12.02. Dvorana u kojoj se odigravaju utakmice Prve futsal lige FBiH mora biti zagrijana na optimalnu temperaturu.

Član 13.

- 13.01. Klub domaćin obavezan je kvalitetno snimiti utakmicu Prve futsal lige FBiH na DVD-u i neposredno po završetku utakmice DVD u zapečaćenoj koverti, ovjerenoj klupskim pečatom, predati delegatu utakmice. Obavezno je snimanje i poslije utakmice, sve dok igrači i službene osobe ne napuste teren za igru i to pod prijetnjom disciplinskih sankcija.
- 13.02. Snimanje se vrši u skladu sa posebnim uputstvom koje je sastavni dio ovih Propozicija.
- 13.03. Klub domaćin je obavezan omogućiti snimanje svake prvenstvene utakmice gostujućem klubu. Ukoliko klub domaćin pravi smetnje klubu-gostu prilikom snimanja, delegat će odmah obavijestiti Komisiju za takmičenje. Gostujući klub ima pravo snimati utakmicu u dvorani drugog kluba, ali nema pravo istu emitirati na bilo kojoj TV stanici bez odobrenja kluba domaćina. U slučaju nepridržavanja naprijed navedenih odredbi klub će snositi takmičarske i disciplinske posljedice.
- 13.04. Klub koji je prema ovim Propozicijama bio obavezan, a ne snimi utakmicu, ili koji ne dozvoli gostujućem klubu snimanje utakmice, klub koji u propisanom roku nadležnom organu ne dostavi video-materijal sa utakmice ili ga dostavi u neispravnom ili neupotrebljivom stanju, bit će kažnjen:
- novčanom kaznom od 500 KM do 2.000 KM,
 - a u težem ili ponovljenom slučaju od 1.000 KM do 3.000 KM.

V – TRAJANJE IGRE I ZAKAZIVANJE UTAKMICA

Član 14.

- 14.01. Utakmica klupskog takmičenja u malom nogometu/futsalu traje 2x20 minuta, a tokom utakmice mogu se izvršiti više izmjena igrača, a u skladu sa pravilima igre malog nogometa/futsala.

Član 15.

- 15.01. Klub domaćin obavezan je da delegatu utakmice stavi na raspolaganje ispravan računar sa priključkom na internet i printer. Klubovi su dužni da najkasnije 45 minuta prije početka utakmice, dostave delegatu na propisanom obrascu, spisak igrača i službenih lica koja će nastupati na utakmici kao i odgovarajuće akreditacije za iste. Sve osobe, igrači i službena lica sa dostavljenog propisanog obrasca za utakmicu, moraju biti licencirane/akreditovane od strane NS/FS BiH i NS FBiH i registrirane u COMET informacionom sistemu.

Član 16.

- 16.01. Utakmice se mogu zakazati u terminu (početak utakmice) od 13:00 do 20:00 sati i to ukoliko se igra u subotu ili nedjelju. Ukoliko se iznimno igra nekim drugim danom u sedmici, utakmica se može zakazati u terminu (početak utakmice) od 17:00 do 20:00 sati.
- 16.02. Utakmice se mogu igrati i u drugom terminu uz pismeno odobrenje protivničkog kluba.
- 16.03. Klub domaćin obavezan je u NS FBiH, kao i protivničkom klubu, u pismenoj formi, dostaviti tačnu satnicu početka utakmice i to najkasnije četiri dana (srijeda do 14 sati) prije određenog dana za odigravanje utakmice.
- 16.04. Klubu koji ne postupi po prethodnom stavu, automatski se odlukom Disciplinske komisije izriče novčana kazna od 100 KM.

Član 17.

- 17.01. Klubovi su obavezni odigrati svaku utakmicu predviđenu rasporedom i kalendarom takmičenja.
- 17.02. Klub koji ne doputuje na utakmicu ili ne obezbijedi dvoranu za utakmicu, pored takmičarskih posljedica (registracija utakmice službenim rezultatom), prema odredbama Disciplinskog pravilnika NS/FS BiH će se kazniti:
 - oduzimanjem od tri do dvanaest bodova.
 - novčanom kaznom od 500 KM do 2000 KM, koju je klub dužan platiti na račun NS FBiH u roku od 15 dana od dana primitka odluke.

Član 18.

- 18.01. Svaki nedolazak na utakmicu smatra se neopravdanim, izuzev slučaja više sile što u svakom konkretnom slučaju cijeni Komisija za takmičenje.
- 18.02. Klub koji započinje takmičenje obavezan je da registruje dovoljan broj igrača, kao i da se stara o blagovremenom dolasku na utakmicu vodeći računa o eventualnim smetnjama na putovanju (kvar na vozilu, zastoje i drugo).
- 18.03. Gostujući tim obavezan je u dvorani gdje se igra utakmica biti najkasnije 60 minuta prije zakazanog početka utakmice, a sastav tima sa igračkim legitimacijama dostaviti delegatu 45 minuta prije početka utakmice.
- 18.04. U slučaju neodigravanja dvije prvenstvene utakmice, prema odredbama Pravilnika o nogometnim takmičenjima/natjecanjima BiH, klub će biti isključen iz takmičenja/natjecanja i snosit će disciplinske posljedice.

VI – PROMJENA TERMINA, ODLAGANJE UTAKMICE

Član 19.

- 19.01. Promjena termina odigravanja utakmice može se vršiti na osnovu podnesenog pismenog zahtjeva zainteresiranog kluba, koji mora biti podnesen Komisiji za takmičenje, najkasnije osam (8) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina utakmice s priloženom dokumentacijom iz koje se može utvrditi opravdanost podnesenog zahtjeva sa eventualnim prijedlogom za novi termin odigravanja utakmice.

- 19.02. U slučaju kada zahtjev za promjenu termina nije podnesen u skladu sa prethodnim stavom, ili se za novi termin utakmice predlaže radni dan, Komisija za takmičenje može promijeniti termin utakmice samo ukoliko je klub koji traži promjenu termina dostavio i pismenu saglasnost drugog kluba.
- 19.03. Odluku o izmjeni dana odigravanja utakmice uvijek donosi Komisija za takmičenje nakon sagledavanja svih okolnosti koje mogu imati uticaja na regularnost takmičenja. Utvrđena satnica početka utakmice koju je klub najavio najkasnije četiri dana prije dana odigravanja utakmice, može se u opravdanim slučajevima promijeniti odlukom Komisije za takmičenje.

Član 20.

- 20.01. Utakmica se može odgoditi ukoliko je iz jednog tima pozvano dva ili više igrača u reprezentaciju Bosne i Hercegovine radi odigravanja utakmica predviđenih kalendarom takmičenja.
- 20.02. Odluku o odlaganju utakmice donosi nadležni takmičarski organ i o tome pismeno obavještava zainteresirane klubove.

Član 21.

- 21.01. U slučaju proglašenja vanrednog stanja ili stanja nesreće od strane nadležnih organa BiH ili Federacije BiH, sve odluke vezane za takmičenje donosi Komisija za takmičenje NS FBiH odnosno Izvršni odbor Nogometnog saveza Federacije BiH u skladu sa Statutom Nogometnog saveza Federacije BiH i ostalim pravilnicima i odlukama.

VII – PRAVO NASTUPA IGRAČA

Član 22.

- 22.01. Na prvenstvenim utakmicama mogu nastupiti igrači koji su stekli pravo igranja prema odredbama Pravilnika o registracijama klubova i igrača i statusu i transferu igrača NS/FS BiH, ukoliko su navršili 17 godina života, kao i igrači koji su navršili 16 godina ali sa obaveznim specijalističkim ljekarskim pregledom koji nadležni registracioni savez unosi u COMET informacioni sistem, na osnovu dokaza o obavljenom specijalističkom ljekarskom pregledu, dostavljenom od strane kluba, sa jasno naznačenim rokom trajanja istog, a kojim se proglašava sposobnim za nastupanje na utakmicama seniorskog uzrasta.
- 22.02. Na utakmicama Prve futsal lige FBiH mogu nastupiti samo igrači koji su operativni u COMET informacionom sistemu (koji su prošli proces registracije).
- 22.03. Svaka ekipa u zapisnik sa utakmice prijavljuje minimalno osam igrača. Klubovi koji nemaju najmanje osam igrača u zapisniku sa utakmice snosit će disciplinske sankcije.
- 22.04. Na početku utakmice svaka ekipa mora imati pet igrača. Ako u slučaju isključenja igrača ostane manje od tri igrača (uključujući vratara) u bilo kojoj ekipi, utakmica se mora prekinuti.
- 22.05. U sastavu prijavljenog tima Prve futsal lige moraju se nalaziti najmanje dva (2) igrača mlađa od 21 godine života, koji moraju biti fizički prisutna na klupi za rezervne igrače u sportskoj opremi i upisani u zapisnik sa utakmice.
- 22.06. Za takmičarsku 2021/2022 godinu, kao igrači mlađi od 21 godine života smatraju se igrači rođeni 01.01.2000. godine i mlađi.
- 22.07. U slučaju nedostatka mlađih igrača do 21 godine, suprotno navedenom stavu ovog člana, utakmica će biti registrovana službenim rezultatom 3:0 (par forfe) u korist protivnika.

- 22.08. Na prvenstvenim utakmicama nemaju pravo nastupa igrači koji se nalaze pod suspenzijom, kaznom zabrane igranja i automatskom kaznom zbog tri opomene.
- 22.09. Automatsku kaznu zabrane igranja jedne prvenstvene utakmice nastalu zbog dobivene tri opomene, igrač izdržava na prvoj sljedećoj prvenstvenoj utakmici.
- 22.10. Na svim prvenstvenim utakmicama može biti prijavljeno do devet (9) zamjenskih igrača. Igrač registriran za veliki nogomet može u jednom danu nastupiti na dvije utakmice i to isključivo na jednoj utakmici futsala i jednoj utakmici velikog nogometa.

Član 23.

- 23.01 Svaki igrač koji nastupa u takmičenju mora u COMET informacioni sistem imati unesen period važenja ljekarskog pregleda i period za koji je uplaćena članarina. Obavljeni ljekarski pregled mora sadržavati obavezujuće elemente koje je propisala Komisija za sportsku medicinu NS FBiH.
- 23.02. Rok važnosti ljekarskog pregleda za igrače koji na dan izvršenog pregleda ima najmanje 17 (sedamnaest) i više godina života traje 6 (šest) mjeseci, a za mlađe igrače 4 (četiri) mjeseca.
- 23.03. Za igrača koji nema upisan važeći ljekarski pregled u COMET informacioni sistem ili važeću potvrdu, delegat utakmice neće dozvoliti nastup na utakmici.
- 23.04. Za sva ostala pitanja u vezi sa ljekarskim pregledom igrača primjenjivat će se odredbe člana 56. Pravilnika o nogometnim/fudbalskim takmičenjima NS/FS BiH.

Član 24.

- 24.01. Na prvenstvenim utakmicama mogu nastupiti samo igrači čiji je identitet utvrđen putem fotografije iz COMET informacionog sistema, a u slučaju njenog nedostatka identitet će se utvrditi na osnovu javne isprave: lične karte ili pasoša, odnosno štampane ID COMET kartice. Igraču sa neadekvatnom pohranjenom fotografijom u COMET informacionom sistemu (kada je nemoguće utvrditi identitet), delegat utakmice neće dozvoliti nastup na utakmici.
- 24.02. Identitet se u pravilu utvrđuje prije početka utakmice.
- 24.03. Za igrače koji su zakasnili na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.
- 24.04. Svi igrači moraju imati adekvatnu fotografiju pohranjenu u COMET informacioni sistem.

Član 25.

- 25.01. U takmičenju Prve futsal lige FBiH dopušten je nastup **tri (3)** igrača strana državljanina na utakmici. Igračima stranim državljanima ne smatraju se igrači koji imaju dvojno državljanstvo od kojih je jedno Bosne i Hercegovine.
- 25.02. U slučaju većeg broja stranih igrača, suprotno navedenom stavu ovog člana, utakmica će biti registrovana službenim rezultatom 3:0 (par forfe) za protivnika u korist protivnika, a klub će snositi i disciplinsku odgovornost.

VIII – OPREMA IGRAČA

Član 26.

- 26.01. Klubovi moraju poštivati boju sportske opreme kluba protivnika (domaćeg kluba), koje su prije početka prvenstva prijavljeni u Sekretarijat saveza i objavljena u biltenu NS FBiH.
- 26.02. Timovi na jednoj utakmici ne mogu igrati u istim ili sličnim bojama sportske opreme. U slučaju da se podudara boja opreme kod dva tima dresove će promijeniti domaća (prvoimenovana) ekipa, a delegat utakmice je obavezan prijaviti tim zbog zanemarivanja boje sportske opreme a klub će snositi disciplinsku odgovornost.
- 26.03. Brojevi na dresovima moraju odgovarati onima na popisu igrača u zapisniku o utakmici. Ako su dresovi prugasti ili šareni, brojevi moraju biti na jednobojnoj podlozi. Za vrijeme odigravanja utakmice igrači na poleđini dresova moraju imati vidljive brojeve propisane veličine.
- 26.04. Obavezna oprema igrača je:
- dres
 - šorts
 - štucne
 - kostobrani
 - odgovarajuće patike
- 26.05. Igrači koji se nalaze u tehničkom prostoru obavezni su nositi markere sa brojevima koji su identični brojevima na dresu igrača, navedeno se odnosi i na igrača koji u igri mijenja vratara.
- 26.06. Vratar može da nosi donji dio trenerke, kao i dres u boji koja će ga jasno razlikovati od drugih igrača i sudija. Ako drugi igrač mijenja vratara, mora imati identičan dres kao vratar i sopstveni broj na dresu.

IX – DELEGAT UTAKMICE

Član 27.

- 27.01. Za svaku prvenstvenu utakmicu Komisija za takmičenje određuje delegata koji zastupa NS FBiH i ima vrhovni nadzor na utakmici. Delegat je dužan doći u dvoranu 60 minuta prije vremena određenog za početak utakmice.
- 27.02. Delegat je dužan putem igračkih legitimacija ili na drugi način utvrđen Pravilnikom o nogometnim takmičenjima obaviti pojedinačnu identifikaciju svih igrača prijavljenih za utakmicu.
- 27.03. Delegat utakmice zapisnik i izvještaj sa utakmice dostavlja kroz COMET informacioni sistem a ostalo prema posebnom uputstvu takmičarskog organa.
- 27.04. Delegat na utakmici je obavezan u roku od 24 sata po odigranoj utakmici kroz COMET informacioni sistem zaključiti delegatski izvještaj.
- 27.05. Sudac izvještaj piše u COMET informacionom sistemu. Sudac je obavezan sa delegatom utakmice sačiniti zapisnik, te provjeriti vjerodostojnost unosa podataka u COMET informacionom sistemu.
- 27.06. Na prvenstvenim i Kup utakmicama delegatsku dužnost obavljat će delegati sa futsal liste delegata NS FBiH i NS/FS BiH.

Član 28.

- 28.01. Delegat je obavezan izvršiti i druge radnje koje mu povjeri Komisija za takmičenje. Delegat koji se u svezi sa obnašanjem svoje dužnosti nedovoljno zalaže, odnosno ne provodi zaključke, odluke ili koji pokaže nedovoljno poznavanje Pravila igre za mali nogomet, bit će izostavljen u jednom ili u više delegiranja.
- 28.02. Ukoliko na utakmici dođe do incidenta, prekida utakmice, isključenja igrača delegat je obavezan u roku 24 sata dostaviti dopunsko izvješće, a na zahtjev Komisije ili Sekretarijata i u drugim situacijama. Na poziv Sekretarijata ili takmičarskog organa, delegat je dužan izvještaj ili dopunski izvještaj dostaviti i ranije, a što se odnosi i na sudije.

X – NOGOMETNI SUCI

Član 29.

- 29.01. Za sve prvenstvene utakmice, suce određuje Komisija za suđenje NS FBiH. Suci su dužni doći u dvoranu 60 minuta prije vremena predviđenog za početak utakmice, pregledati teren u smislu Pravila igre za mali nogomet i ustanoviti njegovu sposobnost za igru. Ako suci ustanove da je dvorana neosposobljena za igru i da se utakmica ne može igrati, dužni su svoju odluku priopćiti delegatu utakmice koji će o tome obavijestiti Komisiju za takmicenje NS FBiH.
- 29.02. Komisija za suce i suđenje NS Federacije BiH može na utakmice, za koje procijeni da bitno utiču na položaj na tablici i utakmice koje odlučuju o plasmanu, odrediti i posmatrača suđenja sa liste m:tel Prve ili Druge lige Federacije BiH.

Član 30.

- 30.01. Prvenstvene i Kup utakmice sude nogometni suci sa Futsal liste sudaca NS FBiH i NS/FS BiH.
- 30.02. Ako sudac koji je određen za suđenje utakmice ne dođe u određeno vrijeme za početak utakmice, utakmicu će suditi pomoćni sudac. Ukoliko na utakmicu ne dođe niti pomoćni sudac klubovi će se pismeno sporazumjeti da utakmicu sudi jedan od prisutnih sudaca saveznog/entitetskog ranga.
- 30.03. U slučaju da klubovi ne postignu sporazum, delegat utakmice će odlučiti koji će od prisutnih sudaca suditi utakmicu, što sve treba zapisnički konstatirati. Ukoliko sudac otkaže nalog za suđenje, obavezan je u pismenoj formi o tome obavijestiti NS FBiH i obrazložiti razlog otkaza.

XI – ZABRANA NASTUPA ZBOG SUSPENZIJE

Član 31.

- 31.01. Suspendovani tim ne može nastupiti na javnoj utakmici sve dok traje suspenzija. Suspendovani igrači ne mogu nastupiti sve dok traje suspenzija.
- 31.02. Sve odigrane utakmice u vrijeme suspenzije izrečene radi neizvršavanja pravosnažnih odluka nadležnih organa ili neizvršenja nespornih obaveza nastalih iz natjecanja predviđenih ovim Propozicijama, registrirat će se 3:0 (par-forfe) u korist protivnika.

XII – REGISTRACIJA UTAKMICA

Član 32.

- 32.01. Ako na utakmicu nije uložena žalba, a ne postoje uslovi za registraciju po službenoj dužnosti, utakmicu Komisija za takmičenje NS FBiH registruje postignutim rezultatom.
- 32.02. Ako je prvostepena odluka pravosnažna, ili je donijeta drugostepena odluka koja je konačna, jednom registrovana utakmica ne može biti poništena, izuzev u postupku zaštite zakonitosti Pravilnika o nogometnim takmičenjima NS/FS BiH.
- 32.03. Komisija za takmičenje NS FBiH vrši analizu i registraciju odigranih utakmica na prvom narednom sastanku.
- 32.04. Izuzetno, Komisija za takmičenje NS FBiH registraciju odigranih utakmica može izvršiti putem e-maila, telefona ili faksa. Verifikaciju registrovanih utakmica vrši Komisija za takmičenje NS FBiH na prvoj narednoj sjednici.
- 32.05. Ako je na utakmicu uložena žalba, rok za registraciju utakmice se produžava do konačne odluke.

XIII – ŽALBE

Član 33.

- 33.01. Žalbe se po svim osnovama moraju najaviti 24 sata nakon odigrane utakmice elektronskim putem, telegramski, e-mailom ili faxom koji ima automatski ispis datuma i vremena o najavi žalbe.
- 33.02. Žalba sa pismenim obrazloženjem sa dokazom o uplaćenju taksu mora se dostaviti u NS Federacije BiH u roku od 48 sati po odigranoj utakmici.
- 33.03. Ukoliko rok za ulaganje žalbe ili najava žalbe ističe u nedjelju ili na državni praznik, rok za ulaganje žalbe se produžava za prvi naredni radni dan.
- 33.04. Žalba se dostavlja putem Sekretarijata NS FBiH, Komisiji za takmičenje NS FBiH.
- 33.05. Uz žalbu se dostavlja dokaz o uplaćenju taksu u skladu sa odlukom IO NS FBiH.

Član 34.

- 34.01. Nenajavljene, neblagovremene i žalbe koje nisu uredno taksirane neće biti uzete u razmatranje, već će biti odbačene, a utakmica će se registrovati postignutim rezultatom.
- 34.02. Odluke po uložnim žalbama biti će donijete u roku od osam dana od dana prijema žalbe.
- 34.03. Pri ocjeni pravovremenosti i validnosti najave žalbe i žalbe uzima se u obzir datum poslanog e-maila, poštanski žig preporučenog pisma ili telegrama, datum na faksu kao potvrda o žalbi te datum na novčanoj uplatnici.

Član 35.

- 35.01. Žalbe u prvom stepenu rješava Komisija za takmičenje NS FBiH.

Član 36.

36.01. Žalba na prvostepenu odluku može se podnijeti Apelacionoj komisiji NS FBiH, u roku od osam dana od dana prijema odluke prvostepenog organa. Drugostepena odluka je konačna i biće dostavljena Komisiji za takmičenje NS FBiH na realizaciju.

Član 37.

37.01. U interesu regularnosti takmičenja i potrebe hitnosti postupka, organ koji donosi odluke može utvrditi i skraćeni žalbeni postupak.

XIV – FINACIJSKE ODREDBE

Član 38.

38.01. Kotizaciju u iznosu 1.200 KM za klubove Prve futsal FBiH, kojom se finansira rad organa koji u procesu takmičenja razmatraju pitanja takmičenja/natjecanja i donose odluke u vezi sa takmičenjem, kao i izvršavanje administrativno-tehničkih i drugih poslova, klubovi uplaćuju na transakcijski račun NS FBiH.

38.02. Uplata kotizacije vrši se prije žrijebanja takmičarskih brojeva.

38.03. Klubovi koji u predviđenom roku ne izvrše uplatu kotizacije neće biti uvršteni u žrijeb takmičarskih brojeva te neće učestvovati u takmičenju Prve futsal lige FBiH.

Član 39.

39.01. Službenim licima za utakmice Prve futsal lige Federacije BiH pripada sljedeća taksa:

- Delegatu utakmice..... 60 KM
- Prvom sucu utakmice..... 60 KM
- Drugom sucu utakmice.....60 KM

Službena lica nemaju pravo na dnevnicu.

39.02. Ukoliko službena osoba na utakmicu putuje do 30 kilometara (u jednom pravcu) van mjesta boravka ima pravo na putne troškove u iznosu od 10 KM.

39.03. Ukoliko službena osoba na utakmicu putuje više od 30 a manje od 50 kilometara (u jednom pravcu) van mjesta boravka ima pravo na putne troškove u iznosu od 20 KM.

39.04. Ukoliko službena osoba na utakmicu putuje više od 50 kilometara (u jednom pravcu) van mjesta boravka ima pravo na putne troškove u iznosu od 30 KM.

39.05. Ukoliko službena osoba na utakmicu putuje više od 100 kilometara (u jednom pravcu) od mjesta boravka ima pravo na putne troškove u iznosu od 40 KM.

39.06. Ukoliko službena osoba na utakmicu putuje više od 150 kilometara (u jednom pravcu) od mjesta boravka ima pravo na putne troškove u iznosu od 50 KM.

39.07. Ukoliko je na utakmicu Prve futsal lige FBiH određen posmatrač suđenja istom pripada taksa u visini takse delegata utakmice.

Član 40.

40.01. Navedene iznose naknada za službena lica (suci/delegati) klub je obavezan uplatiti svakoj službenoj osobi pojedinačno, najkasnije 24 sata po odigranoj utakmici obavezno na žiro račun.

- 40.02. Ukoliko klub ne isplati službena lica ili ih djelimično isplati, klubu se ostavlja rok od dodatna 24 sata da izmiri troškove, nakon čega nastupa suspenzija do izmirenja obaveza u cijelosti, uz automatsku novčanu kaznu u iznosu od 100 KM zbog zanemarivanja obaveza.
- 40.03. Validnu kopiju dokaza uplate službenim licima (suci/delegat) klub je obavezan dostaviti delegatu na brifingu prije početka naredne utakmice, što će delegat precizno utvrditi prije utakmice.
- 40.04. Ukoliko klub ne dokaže delegatu da je izvršio uplatu obaveze iz prethodne utakmice usljed automatske suspenzije klubu neće biti dozvoljeno da odigra utakmicu.

Član 41.

- 41.01. Novčana kazna za crveni karton iznosi 50 KM, a za žuti 25 KM, sa rokom uplate prema odluci Disciplinske komisije NS FBiH.

XV – UTVRĐIVANJE PLASMANA

Član 42.

- 42.01. Plasman klubova utvrđuje se prema odredbama Pravilnika o nogometnim takmičenjima Nogometnog/fudbalskog saveza BiH.
- 42.02. Shodno odlukama IFAB-a gol u gostima se ne računa dvostruko.
- 42.03. Prvaci Prve lige FBiH grupa 1, grupa 2, grupa 3 i grupa 4 plasirat će se u završni dio takmičenja.
- 42.04. Pobjednici u polufinalnim utakmicama, ostvarit će plasman u finale.
- 42.05. Play-off se igra po dvostrukom kup sistemu (domaćin-gost) nakon obavljenog žrijeba.
- 42.06. U slučaju identičnog rezultata nakon dvije utakmice, izvode se udarci sa tačke od šest metara kojim se dobija pobjednik, a prema Pravilima futsal igre.
- 42.07. Pobjednik nakon dvije finalne utakmice je prvak Prve futsal lige FBiH, te ostvaruje plasman u Premijer futsal ligu BiH.

XVI – POPUNJAVANJE LIGE

Član 43.

- 43.01. U narednoj takmičarskoj sezoni 2022/2023 formirat će se jedinstvena Prva futsal liga Federacije BiH i dvije ili tri grupe Druge futsal lige Federacije BiH, zavisno od broja prijavljenih klubova.
- 43.02. Prva futsal liga Federacije BiH u takmičarskoj sezoni 2022/2023 brojat će 10 ili 12 klubova, a odluku o broju klubova u narednoj takmičarskoj sezoni će donijeti Izvršni odbor NS Federacije BiH najkasnije do početka drugog dijela takmičarske sezone 2021/2022.
- 43.03. Prvu futsal ligu Federacije BiH u takmičarskoj sezoni 2022/2023 činit će:
- klubovi koji napuste Premijer futsal ligu BiH na kraju sezone 2021/2022;
 - po dva najbolje plasirana kluba iz grupe 1, 2 i 3 i jedan najbolje plasirani klub iz grupe 4;
 - ostali klubovi do broja 10 ili 12 prema odluci Izvršnog odbora NS FBiH uvažavajući sve relevantne parametre;

43.05. Svi ostali klubovi prema plasmanu kao i novoformirani klubovi će u takmičarskoj sezoni 2022/2023 nastupati u takmičenju Druge futsal lige Federacije BiH.

XVII – PRIJELAZNE I ZAVRŠNE ODREDBE

Član 44.

44.01. Za sve što nije predviđeno ovim Propozicijama vrijede odredbe Pravila igre za "Futsal" (mali nogomet), Odluke Međunarodnog borda, Pravilnika o nogometnim takmičenjima.

Član 45.

45.01. Ove propozicije stupaju na snagu danom donošenja, a objavljuju se u Službenom glasniku Nogometnog saveza Federacije BiH.

P R E D S J E D N I K

Dragan Soldo

Broj: 1892/21
Sarajevo: 14.09.2021.

Komisija za takmičenje Nogometnog saveza Federacije BiH, na sjednici održanoj 14.09.2021. godine donosi s l j e d e ć e:

U P U T S T V O
o snimanju utakmica
(aneks Propozicijama takmičenja)

I CILJ UTVRĐIVANJA UPUTSTVA O SNIMANJU

U cilju postizanja potpune regularnosti takmičenja u organizaciji Nogometnog saveza Federacije BiH i omogućavanja uvida od strane takmičarskih organa u kvalitetan video-zapis cijelog toka utakmica i svih momenata od važnosti za takmičenje, Komisija za takmičenje je donijela uputstvo o načinu snimanja utakmica te ostale radnje vezano za snimanje i dostavljanje video-zapisa utakmica nadležnom organu i savezu.

II EVIDENTIRANJE I UPOZNAVANJE SNIMATELJA O UPUTSTVU

Službeni predstavnik kluba domaćina dužan je najkasnije 30 minuta prije utakmice izvršiti neposrednu prijavu pravovremenog dolaska snimatelja kod delegata utakmice, sa evidentiranjem osobnih podataka snimatelja.

Klub domaćin obavezan je snimatelju svake utakmice uručiti uputstvo NS FBiH o načinu snimanja utakmica.

Službeni predstavnik kluba domaćina i snimatelj obavezni su neposredno upoznati delegata o vsti kamere, vrsti DVD-a, postojanju postolja za kameru, dovoljnom broju DVD-ova kako bi bio snimljen cijeli tok utakmice i ostalo vezano za utakmicu prema ovom uputstvu.

Delegat će usmeno upozoriti snimatelja na obaveze i uputstvo o snimanju.

III POZICIJA ZA SNIMANJE

Klub domaćin obavezan je obezbijediti umjesto za snimanje utakmica na uzvišenom mjestu minimalne visine 3,0 metra, na poziciji središnje crte igrališta kako bi se kvalitetno smimala cijela površina parketa za igru i cijeli tok utakmice.

Snimatelj za vrijeme snimanja utakmice ne smije biti ometan od strane gledalaca, predstavnika klubova i drugih.

IV NAČIN SNIMANJA UTAKMICA

Snimatelj utakmice obavezan je na kvalitetan način snimiti:

- a) Cijeli tok prvog dijela igre i izlazak igrača i službenih lica sa parketa za igru u svlačionice, sve do ulaska u iste;
- b) Cijeli tok drugog dijela igre i izlazak igrača i službenih lica sa parketa za igru u svlačionice, sve do ulaska u iste nakon završetka utakmice;
- c) Na kvalitetan način snimiti svaki prekid i mogući incident, uz obavezu da snimi i zumira tačno mjesto dešavanja sporne situacije ili incidenta i sva dešavanja u tom slučaju;
- d) Nije dozvoljeno prekidanje snimanja za vrijeme utakmice, odnosno kako je to navedeno u tačkama: a), b) i c);
- e) Ispravno snimiti sva dešavanja ili moguće incidente u vezi sa službenim licima utakmice;
- f) Svaki mogući incident ili sporni momenat potrebno je snimiti sa zumiranjem.

V VRSTA KAMERE I VIDEO DISKA (VIDEO-MATERIJALA)

Utakmica mora biti snimana sa stabilnog postolja kako bi se postigla stabilnost i kvalitet snimka utakmice.

Utakmica mora biti snimana sa kvalitetnom digitalnom kamerom koja zadovoljava potrebe snimanja na predviđenoj udaljenosti od parketa do pozicije kamere.

Utakmice je potrebno snimati digitalnom tehnikom uz korištenje digitalnog video diska (DVD-a).

Snimak utakmice se uručuje delegatu na DVD-u.

Za snimanje nije dozvoljena upotreba prethodno korištenih ili neispravnih DVD-ova.

VI UPOZNAVANJE SNIMATELJA O UPUTSTVU

Klub domaćin dužan je svakom snimatelju utakmice pravovremeno uručiti ovo uputstvo o snimanju, a snimatelj se obavezuje na striktnu primjenu uputstva o načinu snimanja utakmice.

VII DOSTAVLJANJE VIDEO MATERIJALA DELEGATU UTAKMICE

Službeni predstavnik kluba domaćina obavezan je odmah nakon završetka utakmice, originalni snimak u zapečaćenoj koverti uručiti delegatu utakmice.

Delegat utakmice službenim putem, DVD u zapečaćenoj koverti i ostavljenom roku dostavlja u savez koji vodi odnosno takmičenje.

VIII PROPUSTI U SNIMANJU I DOSTAVLJANJU VIDEO-MATERIJALA

Klub koji je prema propisima obavezan, a ne snimi utakmicu, ili koji gostujućem klubu ne dozvoli snimanje utakmice, klub koji snimi ali u propisanom roku ne dostavi nadležnom organu saveza ispravan video-materijal sa utakmice ili ga dostavi u neispravnom ili neupotrebljivom stanju ili na način koji je suprotan ovom uputstvu o snimanju, snosit će sankcije u skladu sa članom 71. DP NS/FS BiH a u vezi sa odlukom IO NS FBiH.

PREDSJEDNIK
KOMISIJE ZA TAKMIČENJE
Mišković Dubravko

NOGOMETNI SAVEZ FEDERACIJE BIH

KLUBOVIMA PRVE FUTSAL LIGE FEDERACIJE BIH

(Aneks Propozicija takmičenja za takmičarsku 2021/2022)

ANEKS – MINIMUM MEDICINSKIH ZAHTJEVA ZA TRETMAN IGRAČA, STRUČNOG ŠTABA TIMA I SUDIJSKOG TIMA

Ovaj dokument detaljno specificira minimum medicinskih zahtjeva za takmičenje u Prvoj futsal ligi Federacije BiH u smislu usluga koje treba osigurati klub domaćin za tretman igrača, stručnog štaba tima i sudijskog tima. Konkretni zahtjevi za svako takmičenje specificirani su u svakom odjeljku.

1. Ljekarsko osoblje

Zahtjevi važe za dan igranja utakmice u Prvoj futsal ligi FBiH

Klub domaćin odgovoran je za obezbjeđenje jednog ljekara obučenog za hitnu medicinsku pomoć koji će biti prisutan uz ivicu terena najmanje od trenutka dolaska timova na stadion i do njihovog odlaska. Tu ulogu može vršiti ljekar domaćeg tima, pod uslovom:

- da je ljekar tima obučen i kvalifikovan za hitnu prvu ljekarsku pomoć i tehnike pružanja pomoći;
- da je imenovan neki drugi dužnosnik iz kluba domaćina za olakšavanje hitne medicinske evakuacije sa stadiona bez odlaganja.

1 x ljekar za hitnu medicinsku pomoć uz teren za igru:

Vrši ulogu medicinskog koordinatora za stadion izuzev ako je obezbijeđen i specifični medicinski koordinator.

Odgovoran za osiguranje potrebne medicinske opreme uz ivicu terena specificirane.

Odgovoran samo za tretman igrača, stručnog štaba tima, sudijskog tima i oficira utakmice.

1 x ekipa za nosila (s nosilima od lesonita i najmanje dva obučena nosača (kvalifikacija u pružanju prve pomoći/iskustvo u nošenju pacijenata na nosilima).

2. Posebna napomena

Svi klubovi Prve futsal lige Federacije BiH obavezni su prije odigravanja svake utakmice obezbijediti:

- Plan organizacije utakmice sa aspekta epidemiološke-zdravstvene zaštite učesnika;
- Osigurati sanitarno-epidemiološke uslove u službenim prostorijama i svlačionicama (sanitarna sredstva, dezinfekcioni materijal itd)
- Osigurati medicinsku opremu u svrhu zaštite od virusa COVID-19 (sanitarne rukavice, zaštitne maske, bezkontaktne toplomjere i sl.)
- Sve osobe koje ne učestvuju u igri na terenu obavezni su nositi sanitarne rukavice i zaštitne maske te poštivati minimalan razmak (1,5 metara) između osoba.

KOMISIJA ZA SPORTSKU MEDICINU

KOMISIJA ZA SPORTSKU MEDICINU NS FBiH

Na osnovu člana 21. Pravilnika o radu Komisija Izvršnog odbora i pravnih tijela Nogometnog saveza Federacije Bosne i Hercegovine, Komisija za sportsku medicinu NS FBiH donosi s l j e d e ć u

O D L U K U
o obavezujućim elementima za ljekarski pregled igrača

Član 1.

Ljekarski pregled igrača mora sadržavati sljedeće minimalne obavezujuće elemente:

Internistički pregled ili pedijatrijski pregled (za igrače do 16 godina), koji obavezno treba sadržavati: EKG analizu u skladu sa UEFA propisima i osnovnu laboratorijsku obradu, Oftalmološki pregled, Stomatološki pregled, Ostale testove i analize prema indikaciji.

Član 2.

Ova Odluka stupa na snagu danom objavljivanja u Službenom glasniku NS FBiH.

O b r a z l o ž e n j e

Komisija za sportsku medicinu NS FBiH je razmatrao odredbe člana 23. Propozicija takmičenja Prve futsal lige Federacije BiH (Ljekarski pregled i članarina).

Istim poglavljem predviđa se obaveza da svaki igrač, koji nastupa u nekom od prednje navedenih takmičenja, obavezno mora imati upisan nalaz o izvršenom ljekarskom pregledu koji sadrži ocjenu o zdravstvenoj sposobnosti u svojoj sportskoj legitimaciji.

Član 23.02. Propozicija takmičenja predviđa i spisak obavezujućih elemenata a za čije donošenje propisuje nadležnost Komisije za sportsku medicinu NS FBiH.

Shodno prednje navedenom, a kako bi se u potpunosti ispoštovala odredba ovog člana, te precizirala i pojednostavila njegova primjena u praksi, Komisija za sportsku medicinu NS FBiH donijela je odluku kao u dispozitivu.

KOMISIJA ZA SPORTSKU MEDICINU